

ini' ptnaq Yutas ki Yaba'

si say mtmaq kawas miyam sami ki mama' mu Tahus, gi smka' kawas nanak hmzinas hiya', yalaw gi yasa pglgan myan mgnaw' ru mhyapas krayryax, ru mlhani' sami si ptlalu' mkayal, ini' sami agal sa tkhzyan kya qu pkayal miyan. ini' sami 'nblayqi psbaq na nbkis myan uzi qu Ggaga' na mtkhzi' qani, nanu' yasa qu pzyux qu ini' miyan baqi Gaga' na pkhzyan qutux ngasal qani.

aw' ga ini' ptnaq kkita' sami ni Yutas ki Yaba' hya', yaba' mu hya' ga ini' saku' niya' gnawgi kmayal hya', ru mutuw mnaku' kawngun mita' rawziq niya' hya'. ga Yutas mu hya' ga, ana saku' min'uqu' ga, yan nqu blaq nya' ktan na', ru ini' saku' niya' ks'angiy uzi, ga psqzyuwan saku' niya' qu psqzyu' na nqwaq hya'.

maha iy mama' Tahus qu wal min'uqu' lga, mutuw niya' wal splawa' sa ini' kta na squliiq, ru halan niya' psqzyu' kiya. iy Yaba' maku' qu mita' sa pin'uqu' mama' mu Tahus hya' lga, si balay pssyuk ki Yutas maku' hiya', ini' niya' ks'angiy hiya', mutuw niya si 'nhwazi kmal kay' nanak hiya'.

mnxal ga, malax sami mqwas biru' ru pgwah sami qmayah na plmukan, ru ktan maku' cyux mhtu babaw na uraw qutux ngahi', ru hbyatun maku' ru qmtaqun myan ki mama' Tahus, ktan lga shngan sami kya nqu Plmukan ru, cyuw hmwaw maha “ swa' mamu qriqun magal ngahi' maku' ” maha lga, mgyay sami' la. mwah sami ngasal lga, nyux rima' mwah ngasal myan qu Plmukan qasa, mwah kmayal na qnuriq myan ngahi' niya' qasa. mtuliq Yaba' mu, si saku' niya hluziy tanux, ru pkslazyun saku' niya' na qaraw ruma', baliy saku' mkzyapun qruyux sraral, nanak yaqu yawpun r'tung nanak pzpawnun maku, nanu' maymaw qarit kwara' aring bzyux ru si tayhuk kakay maku', tmasuq lga, ps'rxun sami naha' ki mama' Tahus la. takwara' qu zyuwaw qasa ga, ini' ks'angi Yaba' mu Mama' Tahus hya', ga ini' saku' ks'angiy uzi ni Yutas mu' kuzing, nanak yaqu psqzyu' na kay' nanak maha “ baqun mamu maha yaqih qu mquriq zyuwaw na squliy hya' ga, ulung simu naha' hali smatu' kya Hasisyu' ga, aki' simu cyux pbhul lga! ”

si maku' si inlungan krayryax qu zyuwaw qani, maha “ swa' nanak ini' cingiy ni Yaba' mu Mama' Tahus hiya' ” ru skal maku' Yaya' zyuwaw qani la, kmal kya Yaya' mu maha “ ana su' si say gi, isu' hya' ga 'laqi' su' ni Yaba' su' rwa! ungat Tayal musa' maha qani psqzyu' isu', kwara' qu Yutas hya' ga, sgalu' naha' kwara' qu kinbahan naha' hya'. bali su' ktan slayun niya' tahus hya'! ”



祖父跟爸爸不一樣

我跟達候斯叔叔的年紀可以算是一樣，因為他只多我半歲而已，由於我們每天都一直在一起玩一起戲耍，也習慣了談話都直呼彼此的名字，對話時也沒有用彼此的稱謂。

老人家也沒有教我們有關稱呼方面的禮節，所以我們對於很多有關家族稱謂方面的規矩也都不了解。

不過祖父跟父親對於我們的態度總是不一樣，父親從來不會跟我開玩笑，而且我也不敢直接看著父親的眼睛。但是祖父就不一樣，雖然我犯錯，他好像還是很喜歡一樣，也不罵我，不過嘴巴的責備還是會的。假如是達候斯叔叔犯錯的話，他就會把他叫到沒有人的地方去，然後在那裡教訓他。如果是父親看見達候斯叔叔犯錯，就跟祖父完全相反，他不會罵他，他只會用輕輕的講而已，我們放學後經過漢人的耕地，我發現有一個地瓜露出地面上，於是就拔起來跟達候斯一起生吃了，結果被當場漢人發現，便叫著說：「你們怎麼偷我的地瓜！」之後，我們就跑走了。回家之後，那個漢人已經來到我家，就是來講有關我偷地瓜的事情。父親起身就把我拉到外面，狠狠的用竹削打我，我以前又沒穿過長褲，都只穿短的褲子而已，所以我才會從大腿到腳全都是傷痕，打完之後，我跟叔叔還被一起罰站。

所有那些事情，我父親都沒有罵過達候斯叔叔，而祖父也沒有罵我，只是用嘴巴責備說：「你們知道偷別人的東西是不對的嗎？好在人家沒有把你們送到警察局去，不然你們現在應該被關起來了。」

這件事情我一直放在心裡，說「為什麼父親都不打達候斯叔叔」的事情。後來我把這整個事情就告訴媽媽，媽媽便說：「沒有辦法呀！因為你是你父親的兒子不是嗎，沒有人可以這樣教訓你，所有做祖父的人都是疼愛自己的孫子的。你又沒看見祖父打你達候斯叔叔的情形。」